



SURAH FATIR: PELABURAN YANG TIDAK AKAN RUGI

*Mahasin Mearaj, Emie Sylviana Mohd Zahid, Mohd Zainodin Mustaffa, Mohamad Zaki Razaly
(UiTM Cawangan Johor)*

Adakah seorang usahawan yang berniaga bermatlamatkan kerugian? Pasti jawapannya tidak. Seorang usahawan mesti mempunyai impian untuk memperoleh semaksimum mungkin keuntungan dalam perniagaan atau pelaburan. Usahawan berjaya mempunyai motivasi, perancangan pengurusan dan pemasaran untuk mencapai matlamat tersebut. Oleh itu, dengan daya usaha yang dilakukan, usahawan mampu melonjakkan jualan mereka di pasaran dunia. Namun tidak dinafikan kadang kala usahawan akan mengalami kerugian dan ujian dalam perniagaan atau pelaburan yang mereka ceburi. Begitulah perumpamaan putaran hidup manusia di atas muka bumi ini berbanding pelaburan yang ditawarkan oleh Allah SWT tidak akan memperolehi sebarang kerugian. Sebagaimana yang terkandung dalam firman Allah SWT di bawah:

Sesungguhnya orang yang selalu membaca Kitab Allah dan tetap mendirikan sembahyang serta mendermakan dari apa yang Kami kurniakan kepada mereka, secara bersembunyi atau secara terbuka, mereka (dengan amalan yang demikian) mengharapkan sejenis perniagaan yang tidak akan mengalami kerugian. (Fatir:29)

Dalam ayat ini, Allah SWT menggunakan perkataan tjarah iaitu pelaburan. Sebagai seorang manusia mereka boleh meningkatkan keuntungan pelaburan untuk kesenangan dunia dan akhirat. Pelaburan ini dijamin akan mendapat keuntungan berlipat kali ganda dengan menjaga 3 amalan berikut:

1. **Membaiki dan membanyakkan membaca al-Quran serta menghayati maksud hingga dapat melaksanakan syariah atau semua perkara yang diperintahkan oleh Allah SWT di dalamnya.**
2. **Melaksana dan membaiki kualiti solat fardu serta menambah amalan solat sunat.**
3. **Mengeluarkan Zakat dan banyakkkan sedekah dari hasil usaha yang diperolehi sama ada dengan cara tersembunyi atau terang-terangan. Allah SWT menjamin akan menggantikan harta yang disedekahkan.**

Dengan amalan tersebut Allah SWT akan meninggikan darjat seorang manusia dengan apa jua gelaran sama ada usahawan, jutawan dan hartawan di dunia dan akhirat.

